

# Tikinnermi nioqquissanik akitsuusigaanngitsumik eqqussineq pillugu Namminersorlutik Oqartussat nalunaarutaat nr. 6, 13. marsi 2023-mersooq

Nioqquissanik eqqussuineq annissuinerlu pillugit Inatsisartut inatsisaat nr. 18, 30. oktober 1992-imeersumi § 17 aamma § 46, imm. 6 aamma 7, naapertorlugit aalajangersarneqarput:

## *Tikinneaq*

**§ 1.** Tikinnertut nunanit allanit tikinnermut atatillugu akitsuuteqarfimmut inuttut tikinnertut paasineqassaaq, tassani Danmark Savalimmiallu ilanngullugit.

*Imm. 2.* Tikinnermi angalasup nioqquissat tulliuttutut amerlassusillit nassarlugilluunniit pisarisinnaavai:

1) Arlaat:

- a) Sikaritsit 200-t,
- b) sikaat 50-5,
- c) cigarillot 100-t,
- d) tupat 250 g, imaluunniit
- e) sukuluut snusilluunniit 250 g.

2) imusivissat immeriaannaalluunniit 200-t.

3) imigassat kimittuut 22 procentimik qaffasinnerusumik aalakoornartortalik imaluunniit hedviinni 2 liiteri 15 aamma 22 procentit akornanni aalakoornartortalik.

4) viinni nerriseq 2,25 liiteri 15 procent inorlugu aalakoornartortalik.

5) immiaaqqaq 2 liiteri.

6) imeruersaatit kulisyreillit 2 liiterit imaluunniit imeruassaatit koffienitallit liiterimut 149 mg-mit annertunerusumik koffeinitalit.

7) imeq imigassaq 1 liiteri.

8) tipigissaat 50 g aamma 0,25 literi tipigissaatit kimikinnerit.

9) kiinnamut tarngutit tipigissaatillu allat katillugit annerpaamik 1.000 koruunit nalinginut.

10) sukkulaatinit mamakujuttunillu nioqquissat katillugit 4 kg.

11) savaaqqap savalluunniit neqaat katillugit 5 kg.

*Imm. 3.* Inuit 18-inik ukioqalereersimasut kisimik tupanit nioqquissianik, imigassanik kimittuunik, viinninik immiaaqqanillu akitsuuteqanngitsunik pisisinnaapput.

**§ 2.** Nioqquissanik § 1, imm. 2-mi taaneqartuni akitsuuteqanngitsunik tuniniaaneq mittarfinni niuertarfinnit, taamatut tuniniaasinnaanermut Akileraartarnermut ingerlatsivimmit akuersissuteqartuni

taamaallaat pisinnaavoq.

#### *Assartuutini sulisut*

§ 3. Assartuutini suliut, tassa umiarsuarni timmisartunilu nunat tamat akornanni ingerlaartuni sulisut, assartuutillu ingerlanneqarnerani tassaniluunniit sullissinermik suliaqartut, Kalaallit Nunaata avataani ullut unnuallu 15-ninit sivikinnerusumik uninngareernermi, uku nassarsinnaavaat:

- 1) Arlaat:
  - a) Sikaritsit 60-t,
  - b) sikaat 40-t,
  - c) cigarilloosit 50-t,
  - d) tupat 250 g, imalluunniit
  - e) snusit 250 g sukuluulluunniit,
- 2) hedviinni 2 liiteri imaluunniit viinni nerriseq 2,25 liiteri, taamaattoq imigassamik kimittuut minillugit.
- 3) Tipigissaat 50 g aamma 0,25 literi tipigissaatit kimikinnerit.

*Imm. 2. Ullut unnuallu 15-nit sivisunerusumik Kalaallit Nunaata avataaneereerluni tikinnermi, assartuinermi sulisut § 1-mi malittarisassat malillugit nioqqutissanik nassarsinnaapput.*

#### *Imartani atortuni/sanaartukkani sulisut*

§ 4. Imartani atortuni/sanaartukkani, tassani qilleriviit misissueeqqaarnernut, ujarlernernut aatsitassanillu kulbrintinilluunniit qalluinermi suliaqartut, akitsuuteqarfimmi nunamut niunerminnut atatillugu uku arlaat nassarsinnaavaat.:

- 1) Sikaritsit 60-t,
- 2) sikaat 40-t,
- 3) cigarilloosit 50-t,
- 4) tupat 250 g, imalluunniit
- 5) snusit 250 g sukuluulluunniit,

*Imm. 2. Akitsuuteqanngitsunik niuersinnaanermi sioqqutsisumik minnerpaamik ullut unnuallu 15-t akitsuuteqarfiup avataaniissimanissaq piumasaqaataavoq.*

*Imm. 3. Imm. 1 malillugu akitsuuteqanngitsitsineq taamaallaat nioqqutissanut akitsuuteqarfiup avataani pisianut atuuppoq.*

#### *Nunani allamiut aalisariutaat*

§ 5. Nunat allamiut aalisariutaanni Kalaallit Nunaata imartaani aalisartuni aammalu umiarsuarni Kalaallit Nunaata imartaaniinnerminni nioqqutissanik akitsuuteqanngitsunik nassataqarnissaminut akuerineqarsimasuni, umiarsuup inuttaanut ataatsimut ullormut unnuamullu ataatsimut amerlanerpaamik ulluni 28-ni naatsorsuullugu nassarneqarsinnaapput viinni 1 literi, imaluunniit hedviinni 0,5 literi, imaluunniit imigassaq kimittooq 0,25 literi, imaluunniit immiaaqqat 2 literit aamma tupanit nioqqutissiat 40 g.

*Imm. 2. Umiarsuarni inuttaasut, imm. 1 naapertorlugu nioqqutissanik akitsuuteqanngitsunik*

pissarsisimasut, akitsuuteqarfiusumit aallarnissartik pissutigalugu umiarsuarmit niusimasut nioqqtissanik akitsuuteqanngitsunik § 3-mi annertussusissamut aalajangersakkat annertoqataannik, nassataqarsinnaatitaapput.

*Imm. 3. Imm. 1 malillugu akitsuuteqanngitsitsineq taamaallaat nioqqtissanut akitsuuteqarfiup avataani pisianut atuuppoq.*

*Takornariat nunani allamiut umiarsuaannut ilaasartaatiniiittut*

**§ 6.** Takornariat nunat allamiut umiarsuaannut ilaasartaatinut ilaasut umiarsuup Kalaallit Nunaata imartaaniinnerani akitsuuteqanngitsunik atugaqarsinnaatitaapput.

*Imm. 2. Takornariat, imm. 1 naapertorlugu akitsuusigaanngitsumik atugaqartut, nioqqtissanik akitsuusigassanik allanik nunaliaasseqqusaanngillat, taamaallaat tupanit, sukkulaatinit aamma mamakujuttunit nioqqtissiat, nammineq atugassat. Kalaallit Nunaat aqquasaarlugu angerlamut aallarnissaq akuersissutigineqarpat takornariat § 1 naapertorlugu nioqqtissat akitsuuteqanngitsut nassatarisinnaavaat.*

*Imm. 3. Imm. 1 naapertorlugu akitsuuteqannginnissaq taamaallaat nioqqtissanut, umiarsuup akitsuuteqarfiusup avataani pisiarisimasaanut, atuuppoq.*

*Inuit akitsuuteqarfimmiaalajangersimasumiknajugaqanngitsut, aalajangersimasumilluunniit uninngaanngitsut*

**§ 7.** Inuit akitsuuteqarfiusumi aalajangersimasumik najaqanngitsut najaqarallartuunngitsulluunniit angalanerni nammineq atugassatut akitsuuteqanngitsumik eqqussinnaavaat tipigissut, kiinnamut tarngutit tipigissullu kimikinnerit nioqqtissanik eqqussuinermi akitsuutit pillugit Inatsisartut inatsisaanni nr. 19, 30. oktober 1992-imeersumi § 1, nr. 18, naapertorlugu akitsuusigassaasut, taamaaliorssinnaappullu taakkua annertussusaat suunerilu piffissap angalaffissap sivisussusianut Akileraartarnermut Ingerlatsiviup naleqqutuusorippagit.

*Akitsuuteqartitsinnginnermut tunngaviit*

**§ 8. 1** aamma §§-it 3 - 7 malillugit akitsuusiinnginnissamut piumasaqaataavoq pisiat imaluunniit angalanermei atortut inuup nammineq nassassagai angalanermiluunniit nassataminnut ilanngullugit nassassagai, taamaalilluni pisiat imaluunniit angalanermei atortut Akileraartarnermut ingerlatsivimmut takutinneqarsinnaaqqullugit.

*Nakkutilliineq*

**§ 9.** Suliffeqarfiit § 2 naapertorlugu tikittunut akitsuuteqanngitsunik nioqqtissanik tuniniaasinnaanermut akuersissuteqartut, imigassanik aalakoornartortalinnik kiisalu tupanik nioqqtissianik tunisinerminnut atatillugu, angalasut nunanit allanit tikinnerannut upternarsaatitut boardingkortimik takutitsinissaat piumasaqaatigissavaat.

*Imm. 2. Boardingkortimik Imm. 1-mi taaneqartumik takutitsinermei, boardingkorti meqqilerneqarluniluunniit, kortip imigassanik aalakoornartunik akulinnik tupanilluunniit nioqqtissianik pisinermut atatillugu atorneqarsimaneranik allatigut nalunaarsorneqassaaq.*

*Imm. 3. Boardingkortit imm. 2-mi taaneqartut imigassanik akulinnik tupanillu nioqqtissianik pisiniaqqinnermi atorneqarsinnaanngillat.*

*Pineqaatissiissutit*

**§ 10.** 1-im, imm. 2-mik aamma 3-mik, § 2-mik, § 3, imm. 1-mi, § 4-mi, imm. 1-mi aamma 3-mi, § 5, imm. 1-mi aamma 2-mi, § 6-im, imm. 2-mi, § 7-im aamma § 8-mi piaaluneerluni mianersuaalliorujussuarluniluunniit unioqqtitsisoq Kalaallit Nunaanni pinerluttaalisitsinermik inatsimmi malittarisassat malillugit akiliisitsinermik pillarneqaatissinneqarsinnaavoq.

*Imm. 2. Imm. 1-im taaneqartutut unioqqtitsisoqarneratigut imaluunniit unioqqtitseriartoqarluarneratigut akiliisitsinermik pillarneqaatissiilluniluunniit akiliisitsisoqanngikkaluartoq nioqqtissaq, taannaluunniit peqanngippat taassuma aningaasangorlugu nalingata amerlaqatai, Kalaallit Nunaanni pinerluttaalisitsinermik inatsimmi malittarisassat malillugit arsaarinnissutigineqarsinnaapput.*

*Imm. 3. Imm. 1 malillugu akiliisitsinerit Nunatta Karsianut nakkartinneqartassapput.*

*Imm. 4. Imm. 2 malillugu arsaarinnissutit Nunatta Karsianut nakkartinneqartassapput.*

*Atuutilerfik*

**§ 11.** Nalunaarut una ulloq 15. marts 2023 atuutilissaaq.

*Imm. 2. Tamatumunnga peqatigitillugu tikinnermi nioqqtissanik akitsuuteqanngitsunik eqqussisinnaaneq pillugu nalunaarut nr. 19, 17. august 2016-meersoq atorunnaarsinneqarpoq.*

*Kalaallit Nunaanni Namminersorlutik Oqartussat, ulloq 10. marts 2023*

Naaja H. Nathanielsen  
Aningaasaqarnermut Naligiissitaanermullu Naalakkersuisoq

/ Nikolai S. Christensen

Namminersorlutik Oqartussat  
Imaneq 4  
3900 Nuuk  
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit  
Namminersorlutik Oqartussat inatsisinut toqqorsiviat  
Naalakkersuisut